

BARTIMEU, TIMEU nia oan

Introdusaun

Tinan ida ne'e, hamutuk ho labarik sira, sei ba hasoru personajen sira ne'ebé hatudu fiar iha sira-nia moris. Ita hahú ho Bartimeu, matan delek Jeriku nian, tanba ho ninia hahalok nia bele hanorin ba labarik sira katak sira presiza buka Jezús nafatin, fiar Nia no pruntu hamriik atu tuir Nia.

Esperiénsia

Ho hena ida bele taka labarik sira nia matan, hafoin animadór halo movimentu ruma (basa liman, baku bola...) no husu ba sira se sira "rona" buat ne'ebé nia halo.

Hahú ho hahalok ne'ebé halo tarutu, nune'e la susar ba labarik sira atu si'ik. Hafoin animadór la'o... no hare se labarik sira si'ik buat ne'ebé nia halo. Maski karik sira la si'ik, animadór sei husu ba sira oinsá sira-nia sentimentu atu la bele haree. Rona tiha sira nia komentariu animadór sei lee evanjellu to'o bainhira dehan katak Bartimeu rona katak Jezús Nazare liu husi ne'ebá.

Animadór sei husu: "Tuir imi-nia hanoin, oinsá nia hatene katak Jezús atu liu, se foin daudaun ba imi susar atu hatene katak ha'u la'o?"

Rona lai sira nia komentariu, animadór bele halo sira hanoin katak ema lubun boot tuir Jezús, nune'e matan delek mós bele hatene.

Iha momento ida ne'e nia bele hasai ona hena husi sira nia matan no reprezenta ho labarik sira, akontesimentu entre Jezús no Bartimeu. Presiza prepara didi'ak hatais sira, tanba Bartimeu nia kapa mak importante iha ita-nia reflesaun.

Tuir mai bele hetan evanjellu ho diálogo, atu favorece katak ida-idak bele hatene didi'ak ninia parte.



Evanjellu: Mk 10, 46-52

N: Wainhira Jezús atu sai ona husi Jeriko ho Nia eskolante sira ho ema lubun boot, ema matan delek ida, Bartimeu, Timeu nia oan, tur iha dalan ninin, husu esmola. Wainhira nia rona katak Jezús Nazare liu husi ne'ebá, nia hahú hakilar hodi dehan,

B: Jezús, David nia Oan, sadia ha'u!

N: Ema barak si'ak nia hodi haruka nia atu nonok, maibé nia hakilar maka'as liután

B: David nia Oan, sadia ha'u!

N: Jezús hamriik hodi haruka atu lori nia mai. Ne'e duni sira bolu ema matan delek ne'e.

1: Aten berani. Hamriik ba. Nia bolu ó.

N: Nia soe tiha nia kapa, hamriik kedas hodi la'o lalais ba Jezús. Jezús lia tun ba nia dehan:

J: Ó hakarak Ha'u sei halo sa loos ba ó?

B: Mestre, halo ha'u haree!

J: Ba, ó-nia fiar soi ó!

N: Nia matan nakloke kedas no nia la'o hamutuk ho Jezús iha dalan.

Lee tiha, bele esplika ba sira katak, ba hebreu sira, **kapa** la'ós de'it buat ruma ne'ebé hatais bainhira sai ba liur, maibé mós bele sai kaputi ba kalan.



Se nune'e, husu ba labarik sira oinsá sira interpreta katak Bartimeu soe tiha nia kapa bainhira hasoru Jezús.



Rona tiha sira-nia resposta, ani-madór sei husu tan kona-ba **finál** evanjellu ida ne'e nian. Loloos sira hein katak evanjellu hotu hanesan ne'e. Se sira mak evangelista Marcos karik, sira sei hakerek final oinsá?

Nu'udar atividade ikus nian, bele apresenta ba sira dezeńu ne'ebé iha sorin ne'e (se hakarak bele halo boot liután): iha sorin karuk iha Bartimeu nia situasaun molok hasoru Jezús, iha sorin loos depois de Jezús. Husu ba labarik sira atu liga malu kuadru ida husi sorin karuk ba ida ne'ebé iha sorin loos hodi evidénsia mudanza ne'ebé mosu.

**“David nia oan
sadia ha'u.”**



Orasaun

Bartimeu bolu Jezús “David nia oan”; Dom Bosco sujere ba ninia labarik sira atu reza beibeik, karik ho frase badak hanesan ida ne'e ne'ebé repete beibeik. Oinsá sira hakarak bolu Jezús no harohan ba Nia? Ez: Jezús ne'ebé hadomi ha'u; Jezús, ha'u-nia Na'i...



Atividade

Iha ita-nia moris mós ita bele hetan milagre barak, se ita haree ho matan fiar nian. Iha tempu ida ne'e nia laran, konvida labarik sira atu haka'as an haree buat furak ne'ebé Maromak halo iha sira-nia moris.